



POLISI ANTI-RASUAH & PENYELEWANGAN MENTERI BESAR SELANGOR (PEMERBADANAN)



Jabatan Integriti dan Governans

Edisi Pertama (2020)

©Hak cipta
Menteri Besar Selangor (Pemerbadanan)

Hak cipta terpelihara

Mana-mana bahagian dalam buku ini tidak boleh diterbitkan semula, disimpan dalam cara yang boleh dipergunakan lagi atau pun dipindahkan dalam sebarang bentuk cara, sama ada dengan cara elektronik, gambar, rakaman dan sebagainya tanpa kebenaran bertulis daripada Penerbit terlebih dahulu:

Diterbitkan oleh:

Jabatan Integriti & Governans,
Tingkat 14, Bangunan Darul Ehsan,
Jalan Indah Seksyen 14,
40000 Shah Alam,
Selangor Darul Ehsan

KANDUNGAN

Bil.	Tajuk	Muka Surat
	Prakata	
1.	Pengenalan	2
2.	Objektif	2
3.	Pemakaian Polisi	3
4.	Definisi	4
5.	Pegawai Badan Awam	5
6.	Definisi Rasuah dan Kesalahan Berkaitan Rasuah	6
6.1	Meminta / Menerima Rasuah	7
6.2	Intipati Seksyen 17A	8
6.3	Menawar / Memberi Rasuah	9
6.4	Tuntutan Palsu	10
6.5	Menggunakan Kedudukan Jawatan Untuk Suapan	11
7.	Peraturan Berkaitan Hadiah	13
8.	Peraturan Berkaitan Keraian dan Hiburan	13
9.	Liabiliti	14
9.1	Gagal Melapor Kesalahan Rasuah	14
9.2	Pemilikan Harta Berlebih-Lebihan	14
9.3	Penyitaan dan Pelucuthakan Harta	14
9.4	Kesalahan Di Luar Malaysia	15
9.5	Liabiliti Korporat (<i>Corporate Liability</i>)	15
10.	Panduan Apabila Berhadapan Dengan Isu Rasuah Dan Penyelewengan	16
10.1	Tolak	16
10.2	Diam	16
11.	Penutup	17

PRAKATA

Menteri Besar Selangor (Pemerbadanan) (MBI) komited untuk memastikan segala perkhidmatan dan urusan operasi termasuk urusanniaga dilaksanakan secara beretika, profesional dan berlandaskan undang-undang serta peraturan demi menginstitusikan standard integriti tinggi dan governans terbaik seiring dengan Visi dan Misi MBI. Komitmen MBI untuk menjadikan integriti sebagai satu prinsip dan budaya yang telah digariskan melalui nilai teras utama iaitu PRINSIP.

Polisi Anti Rasuah dan Penyelewengan MBI ini disediakan sebagai satu dari inisiatif untuk menjadikan MBI terulung dalam standard integriti dan governans terbaik. Oleh itu, MBI tidak akan berkompromi dalam sebarang bentuk salah laku rasuah dan penyelewengan sama ada secara langsung atau tidak langsung yang boleh memberikan risiko undang-undang serta menjejaskan imej dan reputasi MBI.

Semua kakitangan, Ahli Lembaga, pihak berkepentingan dalam MBI dan rakan perniagaan perlu memahami dan mematuhi polisi ini. Pelanggaran kepada polisi ini membolehkan tindakan undang-undang dan/atau tatatertib dikenakan kepada mereka yang terlibat.

Kejayaan untuk membanteras gejala rasuah dan penyelewengan di dalam MBI memerlukan komitmen dan peranan semua pihak. Sekiranya terdapat mana-mana individu yang disyaki melakukan rasuah atau penyelewengan, aduan boleh dibuat berdasarkan polisi yang telah ditetapkan oleh MBI supaya tindakan sewajarnya boleh diambil.

PUAN HAJAH NORITAH BINTI MOHD SIDEK
KETUA PEGAWAI EKSEKUTIF
MBI SELANGOR (PEMERBADANAN)

DISEMBER 2020

1. PENGENALAN

- 1.1 Perlakuan rasuah dan penyelewengan menyumbang kepada ketirisan dan pembaziran di dalam sesebuah organisasi. Ia juga turut menyebabkan reputasi organisasi terjejas dan membawa kepada risiko implikasi undang-undang bukan sahaja kepada pelaku-pelaku rasuah dan penyelewengan malahan kepada organisasi itu sendiri.
- 1.2 Sebagai sebuah organisasi yang menjadi pemacu pembangunan negeri Selangor yang progresif, MBI meletakkan integriti sebagai satu daripada nilai teras utama dalam semua urusan operasinya. Amalan integriti dan governans terbaik di samping kepatuhan kepada undang-undang dan peraturan merupakan benteng yang akan memastikan perlakuan rasuah dan penyelewengan dapat dihindari dari meresap ke dalam budaya organisasi.
- 1.3 Oleh yang demikian, Polisi Anti Rasuah dan Penyelewengan MBI ini disediakan sebagai panduan kepada semua kakitangan MBI, Ahli Lembaga Pengarah MBI, pihak berkepentingan dalam MBI dan rakan perniagaan MBI untuk mengetahui dan memahami kesalahan-kesalahan rasuah dan penyelewengan serta seterusnya mengambil tindakan yang sewajarnya.

2. OBJEKTIF

- 2.1 Objektif Polisi Anti Rasuah dan Penyelewengan MBI adalah seperti berikut:
 - 2.11 Menggariskan kesalahan-kesalahan rasuah dan penyelewengan yang ditegah oleh undang-undang dan peraturan-peraturan.
 - 2.12 Memberi kefahaman dan rujukan mengenai kesalahan rasuah dan penyelewengan melalui huraian definisi serta contoh-contoh situasi;
 - 2.13 Memberi panduan tentang tindakan yang wajar diambil apabila berhadapan dengan situasi perlakuan rasuah dan penyelewengan; dan
 - 2.14 Sebagai satu mekanisme pencegahan bagi mengenal pasti, memahami dan menghindari perlakuan rasuah dan penyelewengan.

3. PEMAKAIAN POLISI

- 3.1 Polisi ini terpakai kepada semua kakitangan MBI, Ahli Lembaga Pengarah MBI, pihak berkepentingan dalam MBI dan rakan perniagaan MBI.
- 3.2 Polisi ini hendaklah dibaca bersama dengan Kod Etika dan Tatalaku Kakitangan MBI; dan mana-mana polisi, peraturan dan prosedur MBI yang sedang diguna pakai serta undang-undang di Malaysia seperti Akta Suruhanjaya Pencegahan Rasuah Malaysia 2009 (Akta 694); Kanun Keseksaan (Akta 574); Akta Syarikat 2016 (Akta 777); Akta Persaingan 2010 (Akta 712); dan lain-lain akta yang berkaitan.
- 3.3 Semua kesalahan rasuah dan penyelewengan serta peraturan dan liabiliti yang dinyatakan di dalam Polisi ini adalah merupakan kesalahan yang ditegah di bawah undang-undang dan peraturan Kerajaan dan MBI. Semua individu adalah dilarang melakukan atau terlibat dengan kesalahan-kesalahan tersebut. Sebarang perlakuan rasuah dan penyelewengan serta kegagalan mematuhi peraturan-peraturan yang dinyatakan di dalam Polisi ini boleh menyebabkan mana-mana individu diambil tindakan di bawah peruntukan undang-undang dan tata tertib.
- 3.4 Bagi mengelakkan keraguan, apa-apa mekanisme polisi anti rasuah dan penyelewengan yang dibuat oleh pihak berkepentingan dalam MBI hanya boleh bertindak sebagai tambahan kepada Polisi ini, dan sekiranya berlaku apa-apa percanggahan, Polisi ini akan diguna pakai.

4. DEFINISI

4.1 Definisi terma yang diguna pakai di dalam Polisi ini membawa maksud seperti berikut:

Agensi penguat kuasa undang-undang	Agensi Kerajaan yang mempunyai fungsi dan kuasa penyiasatan dan penguatkuasaan seperti Polis Diraja Malaysia, Suruhanjaya Pencegahan Rasuah Malaysia dan lain-lain.
Ahli Lembaga Pengarah MBI	Seseorang yang dilantik sebagai Ahli Lembaga Pengarah MBI dan termasuklah mana- mana orang yang dilantik sebagai Ahli dalam mana-mana Jawatankuasa yang ditubuhkan oleh Lembaga Pengarah MBI.
Individu	Individu dalam Polisi ini merujuk kepada kakitangan MBI, Ahli Lembaga Pengarah MBI, pihak berkepentingan dalam MBI dan rakan perniagaan MBI.
Pegawai badan awam	Tafsiran pegawai badan awam adalah sepertimana huraian di para 5 Polisi ini.
Kakitangan MBI	Seseorang yang dilantik bekerja untuk MBI secara tetap, sementara atau kontrak.
Pihak berkepentingan dalam MBI	Organisasi yang ditubuh oleh MBI seperti anak syarikat, Yayasan, Kelab Sukan, Pertubuhan, Persatuan dan Kesatuan Sekerja, termasuklah kakitangan dan Ahli Lembaga Pengarahnya.
Polisi	Merujuk kepada Polisi Anti Rasuah dan Penyelewengan ini.
Rakan perniagaan	Pembekal, kontraktor, juru perunding atau mana-mana pihak yang mempunyai urusan perniagaan atau perkhidmatan dengan MBI dan pihak berkepentingan dalam MBI.
Saudara	Tafsiran Saudara adalah sepertimana maksud di bawah Seksyen 3 Akta Suruhanjaya Pencegahan Rasuah Malaysia 2009 (Akta 694).
Sekutu	Tafsiran Sekutu adalah sepertimana maksud di bawah Seksyen 3 Akta Suruhanjaya Pencegahan Rasuah Malaysia 2009 (Akta 694).
Tindakan yang memudaratkan	Tafsiran tindakan yang memudaratkan adalah sepertimana maksud di dalam Polisi Pemberi Maklumat MBI.

5. PEGAWAI BADAN AWAM

5.1 Menurut Seksyen 3 Akta Suruhanjaya Pencegahan Rasuah Malaysia 2009 (Akta 694), pihak-pihak berikut adalah ditakrifkan sebagai badan awam:

5.11 sesuatu pihak berkuasa berkanun;

5.12 mana-mana pertubuhan yang didaftarkan di bawah sub seksyen 7 (1) Akta Pertubuhan 1966;

5.13 mana-mana badan sukan yang didaftarkan di bawah seksyen 17 Akta Pembangunan Sukan 1997 (Akta 576);

5.14 mana-mana koperasi yang didaftarkan di bawah seksyen 7 Akta Koperasi 1993 (Akta 502);

5.15 mana-mana kesatuan sekerja yang didaftarkan di bawah seksyen 12 Akta Kesatuan Sekerja 1959 (Akta 262);

5.16 mana-mana pertubuhan belia yang didaftarkan di bawah seksyen 9 Akta Pertubuhan Belia dan Pembangunan Belia 2007 (Akta 668); dan

5.17 mana-mana syarikat atau syarikat subsidiari yang terhadapnya atau dalamnya mana-mana badan awam yang disebutkan seperti di atas mempunyai kawalan atau kepentingan.

5.2 Berdasarkan kepada perkara di atas, kakitangan MBI, Ahli Lembaga Pengarah MBI dan pihak berkepentingan dalam MBI adalah disifatkan sebagai pegawai badan awam mengikut tafsiran Seksyen 3 Akta Suruhanjaya Pencegahan Rasuah Malaysia 2009 (Akta 694).

5.3 Oleh yang demikian, mana-mana individu yang ditakrifkan sebagai pegawai badan awam boleh diambil tindakan atas kesalahan-kesalahan khusus yang diperuntukkan kepada penjawat awam di bawah Akta Suruhanjaya Pencegahan Rasuah Malaysia 2009 (Akta 694) dan Kanun Keseksaan (Akta 574).

Definisi Rasuah

Definisi: Penerimaan atau pemberian SUAPAN bertujuan supaya seseorang itu melakukan sesuatu perbuatan yang berkaitan dengan tugas rasminya.



Empat (4) kesalahan utama di bawah Akta SPRM 2009 dan Akta SPRM (Pindaan) 2018 adalah seperti berikut:

Meminta / Menerima rasuah

Menawar / Memberi rasuah

Membuat tuntutan palsu; dan

Menggunakan jawatan / kedudukan untuk suapan

Kesalahan Pertama

1

Meminta/Menerima Rasuah

DEFINISI

Mana-mana individu / syarikat komersil menerima suapan (rasuah) sebagai balasan untuk melakukan atau tidak melakukan sesuatu perkara.

AKTA

- ▶ Akta SPRM 2009 Seksyen 16; dan
- ▶ Akta SPRM (Pindaan) 2018 Seksyen 17(A)

PENALTI

Denda tidak kurang daripada 10 kali ganda jumlah atau nilai suapan atau RM1 juta (mengikut mana-mana yang lebih tinggi)

atau

Penjara tidak melebihi 20 tahun

atau

Kedua-duanya sekali

Kesalahan Pertama

Intipati Seksyen 17(A) Akta SPRM (Pindaan) 2018

Sesuatu organisasi komersil melakukan kesalahan jika seseorang yang bersekutu secara rasuah memberikan suapan dengan niat mengekalkan perniagaan dan faedah organisasi tersebut.

DEFINISI SYARIKAT KOMERSIL

Syarikat diperbadankan dibawah Akta Syarikat 2016

Perkongsian dibawah Akta Perkongsian 1961 & Akta Perkongsian Liabiliti Terhad 2012

Suatu syarikat / perkongsian di mana jua dan menjalankan perniagaan di Malaysia

DEFINISI INDIVIDU BERSEKUTU

Pengarah, pengawal, pegawai, pekongsi atau yang terlibat dengan pengurusan hal ehwal

Kesalahan Kedua

2

Menawar/Memberi Rasuah

DEFINISI

Mana-mana individu menawar / memberi rasuah kepada seorang ejen / pegawai awam sebagai balasan untuk melakukan atau tidak melakukan sesuatu perkara berkaitan hal ehwal ejen / pegawai awam tersebut.

AKTA

- ▶ Akta SPRM 2009 Seksyen 17

PENALTI

Denda tidak kurang daripada 5 kali ganda jumlah atau nilai suapan atau RM10 ribu (mana-mana yang lebih tinggi)

dan

Penjara tidak melebihi 20 tahun

Kesalahan Ketiga

3

Tuntutan Palsu

DEFINISI

Mana-mana individu menggunakan dokumen tuntutan (contohnya pesanan kerajaan, resit dan invois) yang mempunyai butiran atau maklumat palsu dengan niat untuk memperdayakan prinsipalnya (majikan).

AKTA

- ▶ Akta SPRM 2009 Seksyen 18

PENALTI

Denda tidak kurang daripada 5 kali ganda jumlah atau nilai suapan atau RM10 ribu (mana-mana yang lebih tinggi)

dan

Penjara tidak melebihi 20 tahun

Kesalahan Keempat

4

Menggunakan Kedudukan/ Jawatan untuk Suapan

DEFINISI

Pegawai menggunakan kedudukannya dalam membuat keputusan atau mengambil apa-apa tindakan berhubung dengan sesuatu perkara di mana dia, **SAUDARA** atau sekutunya mempunyai kepentingan

AKTA

▶ Akta SPRM 2009 Seksyen 23

PENALTI


Denda tidak kurang daripada 5 kali ganda jumlah atau nilai suapan atau RM10 ribu (mana-mana yang lebih tinggi)

dan

Penjara tidak melebihi 20 tahun

Kesalahan Keempat

Definisi "Saudara" di bawah Seksyen 23 Akta SPRM 2009



7. PERATURAN BERKAITAN HADIAH

- 7.1 Hadiah seperti wang, tambang percuma, hiburan, hamper dan sebagainya tidak boleh diminta atau diterima oleh seseorang individu daripada mana- mana orang yang mempunyai hubungan dengan tugas rasmi individu tersebut. Hadiah juga tidak boleh diterima jika nilai hadiah itu tidak sepadan dengan maksud ianya diberikan ataupun diminta dan diterima dengan niat rasuah atau niat jenayah.
- 7.2 Dalam keadaan di mana pemberian hadiah itu sukar ditolak, seseorang individu itu boleh menerimanya tetapi hendaklah melaporkan secara bertulis kepada ketua jabatan untuk mendapat kelulusan.
- 7.3 Peraturan berkaitan pemberian dan penerimaan hadiah adalah sepertimana Polisi Pemberian dan Penerimaan Hadiah serta Kod Etika dan Tatalaku MBI.

8. PERATURAN BERKAITAN KERAIAN DAN HIBURAN

- 8.1 Keraian seperti kehadiran di acara sosial, majlis makan tengah hari atau makan malam boleh diterima sekiranya ia tidak mempengaruhi pelaksanaan tugas rasmi seseorang individu dan tidak bertentangan dengan apa-apa peraturan sepertimana yang dinyatakan dalam Kod Etika dan Tatalaku MBI, Buku Peraturan dan Disiplin Kakitangan.
- 8.2 Walau bagaimanapun, hiburan tidak boleh diminta atau diterima oleh seseorang individu daripada mana-mana orang yang mempunyai hubungan dengan tugas rasmi individu tersebut atau yang boleh menjejaskan reputasi Jabatan.

9. LIABILITI

9.1 Gagal Melapor Kesalahan Rasuah

911 Mana-mana individu yang diberikan, dijanjikan atau ditawarkan rasuah atau pun telah diminta rasuah hendaklah melaporkan perkara ini kepada Suruhanjaya Pencegahan Rasuah Malaysia atau pegawai polis. Kegagalan melapor tanpa alasan yang munasabah boleh menyebabkan individu tersebut didakwa sebagai melakukan suatu kesalahan. Hukuman bagi kesalahan ini ialah denda tidak melebihi RM100,000 atau penjara tidak melebihi 10 tahun atau kedua-duanya; atau denda tidak melebihi RM10,000 atau penjara tidak melebihi 2 tahun atau kedua-duanya; atau penjara tidak melebihi 6 bulan atau denda atau kedua-duanya [Seksyen 25(1) dan 25(3) Akta Suruhanjaya Pencegahan Rasuah Malaysia 2009 (Akta 694); dan Seksyen 202 Kanun Keseksaan (Akta 574)].

9.2 Pemilikan Harta Berlebih-Lebihan

921 Mana-mana individu yang dikehendaki mengisytiharkan semua harta yang dimiliki olehnya atau yang dia mempunyai kepentingan di dalam atau di luar negara kepada Suruhanjaya Pencegahan Rasuah Malaysia boleh diminta untuk memberikan penjelasan kepada Suruhanjaya tersebut bagaimana individu berkenaan mampu memiliki harta yang dipercayai bersifat berlebih-lebihan. Sekiranya individu berkenaan gagal memberikan penjelasan yang memuaskan boleh menyebabkan individu tersebut didakwa sebagai melakukan suatu kesalahan. Hukuman bagi kesalahan ini ialah penjara tidak melebihi 20 tahun dan denda tidak kurang 5 kali ganda nilai harta berlebih-lebihan mengikut mana yang tinggi [Seksyen 36(3) Akta Suruhanjaya Pencegahan Rasuah Malaysia 2009 (Akta 694)].

9.3 Penyitaan dan Pelucuthakan Harta

931 Mana-mana wang, barangan atau apa-apa harta yang menjadi hal suatu kesalahan rasuah boleh disita dan dilucutkan sama ada melalui pendakwaan atau pun tanpa pendakwaan [Seksyen 33(1), 37(1), 38(1), 40(1) dan 41(1) Akta Suruhanjaya Pencegahan Rasuah Malaysia 2009 (Akta 694)].

932 Mana-mana harta yang diperolehi atau perniagaan yang dibuat dengan menggunakan hasil daripada kesalahan rasuah juga boleh disita dan dilucutkan sama ada melalui pendakwaan atau pun tanpa pendakwaan di bawah Seksyen 50(1), 51(1), 52(1), 55(1) dan 56(1) Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (Akta 613).

9.4 Kesalahan Di Luar Malaysia

- 941 Kesalahan rasuah dan penyelewengan, di mana berkeajaan, yang dilakukan di luar negara adalah juga disifatkan sebagai menjadi suatu kesalahan seolah-olah ianya telah dilakukan di dalam negara, seperti mana yang diperuntukan di bawah Seksyen 66(1) Akta Suruhanjaya Pencegahan Rasuah Malaysia 2009 (Akta 694).

9.5 Liabiliti Korporat (*Corporate Liability*)

- 951 Mana-mana syarikat perniagaan boleh disabitkan dengan kesalahan rasuah sekiranya mana-mana individu yang bekerja atau bersekutu dengan syarikat tersebut memberikan, menjanjikan atau menawarkan rasuah kepada mana-mana orang untuk manfaat syarikat tersebut seperti untuk memperolehi atau mengekalkan perniagaan [Seksyen 17A Akta Suruhanjaya Pencegahan Rasuah Malaysia 2009 (Akta 694)].
- 952 Sekiranya syarikat milik MBI beroperasi di luar negara atau mempunyai pejabat cawangan di luar negara dan sekiranya mana-mana individu yang bekerja atau bersekutu dengan syarikat itu melakukan kesalahan rasuah untuk manfaat syarikat itu maka syarikat tersebut boleh disabitkan dengan kesalahan di bawah undang-undang negara berkeajaan seperti UK Bribery Act 2010 dan lain-lain.

10. PANDUAN APABILA BERHADAPAN DENGAN ISU RASUAH DAN PENYELEWENGAN

10.1 Tolak

- 1011 Mana-mana individu yang ditawarkan, diberi atau diminta rasuah hendaklah mengambil tindakan dengan menolak tawaran, pemberian atau permintaan rasuah itu. Berikutnya, individu tersebut hendaklah dengan segera melaporkan perkara ini kepada ketua jabatan dan mana-mana pegawai Jabatan Integriti & Governans MBI.
- 1012 Sekiranya mana-mana individu menerima arahan daripada pihak atasannya untuk melakukan atau bersubhat dalam melakukan suatu kesalahan rasuah dan penyelewengan ataupun sesuatu perbuatan yang tidak mengikut undang-undang dan peraturan, maka individu tersebut hendaklah menolak arahan berkenaan dan dengan segera melaporkan perkara ini kepada pegawai yang lebih atas dan mana-mana pegawai Jabatan Integriti & Governans MBI.

10.2 Diam

- 1021 Mana-mana individu yang telah membuat pelaporan berkaitan kesalahan rasuah dan penyelewengan hendaklah tidak mendedahkan pelaporan berkenaan kepada mana-mana pihak lain. Ini bertujuan bagi memastikan dan melindungi apa-apa keterangan dan bahan bukti berkaitan kesalahan tersebut daripada terjejas atau dimusnahkan.
- 1022 Individu berkenaan juga hendaklah turut merahsiakan identiti dan butiran mengenai pihak yang memberitahu kepadanya berkaitan suatu kesalahan rasuah dan penyelewengan itu daripada mana-mana pihak lain. Ini bertujuan untuk melindungi pemberitahu itu daripada sebarang bentuk tindakan yang memudaratkan.

11. PENUTUP

- 11.1 Rasuah dan penyelewengan menyebabkan berlakunya ketirisan dan pembaziran di dalam organisasi serta bertentangan dengan nilai teras utama MBI. Pelaku-pelaku rasuah dan penyelewengan berhadapan dengan risiko disabitkan dengan hukuman di bawah undang-undang seperti Akta Suruhanjaya Pencegahan Rasuah Malaysia 2009 (Akta 694), Kanun Keseksaan (Akta 574), Akta Syarikat 2016 (Akta 777), Akta Persaingan 2010 (Akta 712) serta Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (Akta 613).
- 11.2 Selain itu, pelaku-pelaku rasuah dan penyelewengan juga berhadapan dengan risiko disabitkan dengan hukuman tatatertib di bawah Buku Peraturan Tatatertib Disiplin Kakitangan MBI dan mana-mana peruntukan atau akta yang berkuatkuasa.
- 11.3 Setiap individu bukan sahaja perlu menolak dan menghindari perbuatan rasuah dan penyelewengan tetapi juga hendaklah melaporkan kesalahan tersebut supaya tindakan sewajarnya dapat diambil bagi membendung kesalahan ini daripada berleluasa di dalam organisasi.

